

**Kalaallit Nunatsinni efterskolimik allisitamik, Tasiilami inissinneqartussamik, 2015-imi pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Harald Bianco, Inuit Ataqatigiit)

**Akissuteqaat**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

**Siullermeerinnineq**

Harald Bianco, Inuit Ataqatigiit, Tasiilami inissillugu efterskolimik annertusisamik taaneqartumik pilersitsinissaq pillugu siunnersuuteqarneranut Naalakkersuisut qutsavigaat. Efterskoli annertusisaaq siunnersuuteqartoq malillugu tassaavoq efterskoli kulturimut højskolimik immikkoortortalik tamassumalu saniatigut nunagisaaq qimannagu perorsaasutut ilinniarfimmik immikkoortortaartoq. Pilersitsinermi aningaasartuutit 75 aamma 100 millioner koruunit akornanniissasut siunnersuuteqartup missingerpaa, siunnersuummili ersinngilaq kulturimut højskoli nunagisarlu qimannagu perorsaasutut ilinniarfik akini missingiussani ilaanersut. Naalakkersuisulli piviusorsioertutut isigaat efterskolimik nutaamik ilinniartunut 80-inut inissalimmik pilersitsinermi aningaasartuutit – immikkoortorta qarani – 100 millioner koruunit missaaniissasut.

Tasiilami inissillugu efterskolimik allamik pilersitsinissamik eqqarsaat nutaajunggilaq, siunnersuutip assingi Inatsisartuni maani sionatigut oqaluuserineqartarnikuupput. Apeqqut kingullermik 2012-imi ukiakkut ataatsimiinnermi oqaluuserineqarpoq, tassani Inatsisartut inerniliipput kingusinnerpaamik 2013-imi ukiakkut ataatsimiinnissamut Naalakkersuisut nassuiaasiornissamut peqquneqassasut, tassani Tasiilami efterskolimik inissiinissamik aalajangiinnissamut tamakkiisumik tunngaviliisoqassalluni.

Maannakkut Naalakkersuisuusut 2013-imi upernaakkut naalakkersuisuulermata nassuiaat taamaattoq suliarineqarnikuunngilaq, taamaammallu ilimagisariaqarpoq Naalakkersuisuujunnaartut suliap taassuma salliutinnginnissaa toqqarsimagaat.

Naalakkersuisut siunnersuuteqartoq isumaqatigaat atuartitseriaaseq efterskolinit ingerlassaat nuannarineqartorujussuusooq inuusuttunillu amerlasuunit pilerigineqartoq. Inuusuttorpassuit meeqqat atuarfianni naammassereernerup kingorna Kalaallit Nunaanni Danmarkimiluunniit efterskolerlutik atuarnertik ilasarpaat, ilinniartitsissutini angusatik pitsanngorsarniarlugit imaluunniit namminneq inuttullu ineriartorusullutik – akuttunngitsumik kingusinnerusukkut ilinniagaqarnissaq siunertaralugu.

Naalakkersuisut taamaammat siunnersuuteqartoq tunngaviusumik isumaqatigaat efterskolernissamik qinnuteqartut itigartinneqartut amerlassusaat aallaavigiinnarlugu nunatsinni efterskolini amerlanerusunik inissaqarnissamik pisariaqartitsisoqarsinnaasoq. Naalakkersuisulli aamma ilisimavaat allanik amerlasoorpassuarnik pingaaruteqartunillu suliaaqqartoq ilinniarfeqarnerput pitsanngorsarniarluni suliaqarnitsinni salliutinneqartariaqartunik. Ilinniartitaanermi suli ajornartorsiuteqarpugut – pingaartumik inuussutissarsiutinut ilinniarnerni inissat amigaatigaagut – aammalu ilinniartut inaanni

inissaqarneq suliniuteqarfiuvoq pingaaruteqartoq inuiaqatigiit ukiorpassuarni aningaasaliinissaannik pisariaqartitsiviusoq.

Nunatta aningaasatigut maannakkut inissisimamera inimi maaniittut tamarmik ilisimagunarpaat. Kissaatigut tamaasa pisinnaanngilagut aammalu ilinniartitaanermut aningaasat killeqartut isumatusaarluta tullerriaartariaqarpavut.

Ilinniartitaanermut pilersaarummi nutaami sanaartugassanillu pilersaarusiassami ilinniartitaanerit ataqatigiissumik aaqquissuussaanissaat Naalakkersuisut qulakkeerniarpaat. Ilaatigut susassaqarfinni taakkunani pitsaassutsit qaffatsinniarlugit suli atualinngitsut meeqqallu atuarfiat suliniuteqarfigissallugit toqqarpavut, neriunarporlu susassaqarfiit taakku inuusuttut ilinniaqqinnissaannut sunniuteqassasut. Naalakkersuisut neriutigaat inuusuttut amerlanerusut siunissami meeqqat atuarfianniit inuussutissarsiuutinut ilinniarnernut inuusuttullu iliniarnerannut toqqaannartumik ingerlaqqittassasut aammalu piareersarluni atuartarnerit soorlu Piareersarfinni efterskolinilu piffissap ingerlanerani ikiliartussasut. Ilinniarfitsinni taamaatiinnartarnerit akiornissaat suliniuteqarfittut pingaaruteqartutut pisariaqartutullu Naalakkersuisut aamma sallitippaat. Iltersuisarnerup pitsanngorsarnissaanik suliaqarneq aallartinneqareerpoq aammalu tarnip pissusaatigut inuttullu atukkatigut ilinniartunik siunnersuisarnermik nutaamik pilersitsineq ilusilerneqangajalerluni.

Ikaarsaariarnermi ajornartorsiuteqarneq efterskoleqarnermilu ineriartorneq Naalakkersuisut ukiuni aggersuni qanimut malinnaaviginiarpaat, nunatsinnilu efterskolinik amerlanerusunik pilersitsinissamik isumaliuteqarnissamut aningaasatigut periarfissaqarnersoq ingerlaavartumik nalilersortarniarlugu. Efterskolimik sumi inissiisinnaaneq naleqqunnerpaajunersoq Naalakkersuisut maannakkut oqaatigisinnaanngilaat. Tassani tamanna pillugu inaarutaasumik aalajangiinnginnermi aningaasatigut, pilersuinikkut isumalluutitigullu isumaliutersuutit apeqqutaassapput.

Naalakkersuisut taamatut oqaaseqarlutik siunnersuutip itigartinneqarnissaa inassuteqaatigaat.